

01 SEP 1998

Malaysia-Pelaut

ANAK MALAYSIA SIAP BERLAYAR SOLO KELILING DUNIA

Oleh: Neville D'Cruz

MELBOURNE, 1 Sept (Bernama) -- Seorang rakyat Malaysia, Azhar Mansor, sedang melakukan persiapan untuk memulakan pelayaran solo dengan kapal layar dari Australia minggu depan dan dijangka tiba di negara ini awal bulan depan.

Pelayaran itu merupakan satu permulaan kepada pelayaran solo mengelilingi dunia dari Langkawi ke Langkawi yang akan dilakukannya Disember ini.

Azhar, seorang bekas kelasi kapal dagang, akan menjadi rakyat Malaysia pertama berlayar bersendirian tanpa berhenti mengelilingi dunia, selain orang pertama untuk mencuba laluan baru yang bermula dan berakhir di Lautan Hindi.

Beliau juga akan melakukan pelayaran panjang menuju utara ke Recife di Brazil bagi menamatkan perjalanan sejauh 21,600 batu nautika bagi memenuhi persyaratan Majlis Rekod Pelayaran Laju Dunia.

Azhar akan mendapat peluang baik untuk mencatat rekod baru Terbuka 50, dengan mengambil kesempatan daripada kelajuan angin dan arus yang ada di laluan baru itu.

Beliau akan menggunakan kapal layar baru "Jalur Gemilang" yang dilancarkan di Newcastle, utara Sydney, semalam. Majlis pelancarannya dihadiri Pesuruhjaya Tinggi Malaysia ke Australia Datuk Adnan Othman dan orang ramai termasuk 20 rakyat Malaysia dari Sydney dan Canberra.

Bagi Azhar cabarannya bermula dua tahun lepas apabila beliau mengambil keputusan untuk mencapai impiannya berlayar solo mengelilingi dunia.

"Banyak orang perlu mencapai sesuatu pada usia 40 tahun. Saya sekarang 40 dan sudah tiba masanya saya berbuat sesuatu," katanya kepada Bernama hari ini.

"Saya cintakan kedamaian, laut dan jauh daripada kehidupan yang sibuk," katanya.

Azhar yang tidak mempunyai kekayaan peribadi telah menulis surat kepada Perdana Menteri Datuk Seri Dr Mahathir Mohamad bagi menjelaskan kepadanya mengenai projek itu dan meminta sokongan dan restunya. Azhar kemudiannya mendapat sokongan penuh beliau.

Azhar juga menghubungi rakan yang dikenalnya sejak beberapa tahun lepas, Encik Lee Condell di Sydney dan memintanya menjadi pengurus projek.

Pada mulanya beliau hanya berhasrat membeli kapal layar terpakai tetapi memandangkan beberapa kapal yang diinginkannya seperti True Blue, Newcastle Challenge, Thursday's Child dan Aqua Quorum sudah terjual sebelum beliau dapat mengumpulkan wang yang mencukupi, beliau akhirnya memutuskan untuk membina sebuah kapal layar baru.

Dana yang mencukupi akhirnya dikumpulkan untuk menempah reka bentuk sebuah kapal layar dengan Scott Jutson dari Sydney dan pada Ogos tahun lepas rangka pertama disiapkan di dermaga McConaghy's di Mona Vale, dekat Sydney. Setahun kemudian bot yang telah siap itu dilancarkan di Palm Beach.

Dalam masa dua minggu lepas, Jalur Gemilang, telah digunakan untuk pelayaran percubaan.

Kapal layar itu turut menggunakan peralatan perhubungan yang dibekalkan oleh Sapura dari Malaysia.

-- BERNAMA

NDC